



U ovom broju:

- ➔ JEDINSTVENA KANALIZACIONA MREŽA NA PODRUČJU OPĆINE TEŠANJ
- ➔ OTVORENA NOVA ZGRADA BIBLIOTEKE U TEŠNJU
- ➔ IZGRADNJA CENTRA ZA DJECU SA POSEBNIM POTREBAMA
- ➔ ODRŽANA 33. SJEDNICA OPĆINSKOG VIJEĆA
- ➔ OBILJEŽEN 9. SEPTEMBAR DAN OSLOBOĐENJA OPĆINE TEŠANJ OD FAŠIZMA
- ➔ PROJEKAT HARMONIZACIJE PODATAKA KATASTRA I OPĆINSKE GRUNTOVNICE
- ➔ POTPISANI UGOVORI ZA BIZINS IDEJE MLADIH



OPĆINA TEŠANJ

Trg Alije Izetbegovića 11

www.opcina-tesanj.ba

e-mail: optesanj@bih.net.ba



BESPLATNA OBUKA ZA SOFTWARE PROGRAMERE

Organizacija BILD organizuje besplatnu obuku za software programere koja će se od septembra odvijati u Tešnju. Mogu se prijaviti svi od 18 do 35 godina.

Obuka je naporna i trajat će 12 sedmica i može rezultirati dobivanjem posla u jednoj od prestižnih IT kompanija u regionu.

Već smo uspješno odradili jednu rundu treninga i imat ćete lično priliku da upoznate ljude koji su pohađali našu obuku.

Prenesite vašim prijateljima, poznicima, komšijama i porodici. Obuka je BESPLATNA. Jedino što od vas zahtevamo je posvećenost, rad, trud i učestvovanje u volonterskim akcijama.

Ovaj projekat finansiraju Općina Tešanj, USAID i Švedska međunarodna organizacija za razvojnu saradnju.

Više pročitajte na:

www.mozemo.ba

Prijavite se na:

<http://www.mozemo.ba/prijava.php>

Vaš BILD tim

PROJEKAT HARMONIZACIJE PODATAKA KATASTRA I OPĆINSKE GRUNTOVNICE

Općina Tešanj provodi projekat harmonizacije podataka katastra i gruntovnice. Vrijednost projekta je oko 200.000 KM, a njegov cilj je usklađivanje svih podataka o vlasništvu parcela i objekata na teritoriji Općine, kao jednog od preduvjeta za lakše i jednostavnije raspolaganje imovinom.

Proces harmonizacije podataka je besplatan za građane i poslovne subjekte, a samo u Tešnju je u ovoj fazi projekta evidentirano oko 11.000 parcela sa oko 4000 vlasnika.

Ovim ćemo građanima uštediti ogroman novac i vrijeme. Do sada su mnogi građani da bi uskladili podatke i postali i formalno III vlasnici svojih parcela ili objekata za istu stvar morali plaćati sudovima od 800 do 1.000 KM. Na ovaj način smanjit će se broj sudskih sporova jer će se utvrditi podaci o stvarnom vlasništvu i vlasnicima ovih nekretnina. Ono što nam je posebno važno je da će se olakšati i pojednostaviti administrativni poslovi za nove investitore. Isto tako, imat ćemo i pojednostavljene raspolaganja imovinom kod postojećih investitora prilikom kupoprodaje, davanja imovine pod hipoteku, podizanja kredita, itd. Sve u svemu, konačno ćemo imati jasnu situaciju u vezi veoma važne oblasti raspolaganja imovinom, koja je preduvjet za moderan, stabilan i siguran razvoj. Upravo u skladu sa našim opredjeljenjem da budemo što bolji partner za budućnost našim građanima i vlasnicima kapitala, nakon provedbe ovog projekta, Općina Tešanj će postati još atraktivnija kako za domaće, tako i za inozemne investitore, kazao je Suad Huskić, načelnik Općine Tešanj.

Projekat se uz podršku Svjetske banke i Federalne uprave za geodetske i imovinsko – prave poslove provodi u tri općine u FBiH, i to u Tešnju, Gračanici i Posušju. U projektu sudjeluju općine i općinski sudovi. Općinski katastar je tokom vremena imao promjene u podacima koje su pratile i ažurirale stanja evidencije i terena. Naročito su te promjene bile intenzivne od 1945. Gruntovnice u Sudovima uglavnom su od nastanka (1882. godine) u vrijeme Autrougarske monarhije zadržale stari sistem vođenja evidencija, koje nisu iz različitih razloga ažurne i ne odgovaraju stvarnom stanju. Nakon provedbe projekta dio podataka će biti dostupan građanima putem interneta. U toku je javni poziv građanima da potpuno besplatno uredite ove evidencije. Općina je već uradila svoj dio posla, i sada se pozivaju građani da usklade podatke u Općinskom sudu.

Projekat o kojem je riječ će trajati najmanje još godinu dana, a u Tešnju će biti proveden za 7 katastarskih općina.



Izdaje: **OPĆINA TEŠANJ**

Redakcija:

Edina Kadušić, Ferid Mustafić, Samir Brka,
Kanita Gredelj i Bahrudin Noćić.

Glavni i odgovorni urednik:

Edina Kadušić

Adresa Redakcije:

Općina Tešanj, Trg Alije Izetbegovića 11
74260 Tešanj

Telefoni: 032 650-341 i 032/650-022 (lokal 107)

Fax: 032/650-220

E-mail: press@opcina-tesanj.ba

Tiraž: 2.000

Štampa: Grafik-komerc

ODRŽANA 33. SJEDNICA OPĆINSKOG VIJEĆA

U petak, 11. septembra u Sali Općinskog vijeća Tešanj, sa početkom u 14,00 sati održana je 33. sjednica Vijeća sa predloženim dnevnim redom:

1. Prijedlog Odluke o izmjeni i dopuni Odluke o osnivanju, upravljanju, raspolaganju i korištenju stambenog fonda uz primjenu principa socijalnog stanovanja,
2. Prijedlog Odluke o izmjeni i dopuni Odluke o stambenom zbrinjavanju korisnika kolektivnih vidova smještaja kroz implementaciju projekta "Zatvaranje kolektivnih centara i alternativnog smještaja putem osiguranja javnih stambenih rješenja",
3. Prijedlog Odluke o izmjeni i dopuni Odluke o odobravanju prodaje zemljišta neposrednom pogodbom u Mekišu,
4. Prijedlog Odluke o uspostavi saradnje između Općine Tešanj i Općine Šoštanj u Sloveniji.
5. Prijedlog Rješenja o imenovanju Komisije za procjenu vrijednosti nekretnina,
6. Informacija o stanju bezbjednosti na području općine Tešanj za I polugodište 2015. godine i bezbjednosti učesnika u saobraćaju na području općine Tešanj,
7. Informacija o završetku školske 2014/2015. godine i upisu učenika u školsku 2015/2016. godinu u osnovnim i srednjim školama na području općine Tešanj.

Tokom sjednice, Vijeće je razmatralo sve tačke dnevnog reda i završilo sa radom u 16,05 sati.



ODRŽANA 4. SJEDNICA SAVJETA ZA LOKALNI EKONOMSKI RAZVOJ OPĆINE TEŠANJ

U subotu, 22. augusta održana je četvrta sjednica Savjeta za lokalni ekonomski razvoj općine Tešanj (SLER). Savjet za lokalni ekonomski razvoj je radno tijelo sastavljeno od predstavnika privatnog i javnog sektora, koji zajednički analiziraju teme iz lokalnog ekonomskog razvoja i kroz dijalog pronalaze prilike za dalji razvoj i napredak.

Na sjednici je razmatrano sedam tačaka dnevnog reda, među kojima su: Plan aktivnosti na izradi plana zapošljavanja. Tokom sastanka Savjet za lokalni ekonomski razvoj je informisan i o upisu učenika u srednje škole za školsku 2015/2016. godinu, kao i o realizaciji Sajma privrede Biznis 2015.

Na sjednici je predstavljena i Analiza stanja i potreba za dodatnim usavršavanjem radne snage u općinama Tešanj, Usora, Teslić, Doboj Jug i Žepče i Informacija o prostorno-planskim dokumentima općine Tešanj.

Kao i na prethodnim sjednicama, članovi su informisani o statusu implementacije inicijativa sa prethodnih sjednica, a predložene su i dvije nove inicijative. Naredna sjednica Savjeta za lokalni ekonomski razvoj općine Tešanj je dogovorena za oktobar 2015. godine.



JEDINSTVENA KANALIZACIONA MREŽA NA PODRUČJU OPĆINE TEŠANJ

U proteklom periodu radili smo na ispunjavanju uslova za izgradnju jedinstvene kanalizacione mreže na cijeloj teritoriji općine Tešanj. Najveći dio projektovanja je završen i već je ugovorena prva faza realizacije.

Od 13. augusta su počeli radovi na gradnji glavnog kanalizacionog kolektora (od KP Rad Tešanj do benzinske pumpe Kosovčić u Novom Selu). U ovoj fazi se radi i rekonstrukcija kanalizacione mreže, vodovodne mreže, urađena je rekonstrukcija toplovoda te planira se završno uređenje kaldrme kompletne Titove ulice u Tešnju. Vrijednost ova dva projekta je oko 2,5 miliona maraka, a rok za završetak radova je 90 dana.

Tokom radova na ovim dionicama puteva, saobraćaj je regulisan na drugačiji način. Ovom prilikom, molimo sve građane, a posebno učesnike u saobraćaju za razumjevanje i strpljenje.



SANACIJA KLIZIŠTA NA PODRUČJU OPĆINE TEŠANJ

Nakon provedene procedure javne nabavke, Općinski načelnik Suad Huskić i predstavnici firmi *Trans Kop* d.o.o. Tešanj i *AB trans* d.o.o. Tešanj potpisali su ugovore za Sanaciju putne infrastrukture (klizišta) na području općine Tešanj.

Sa firmom *Trans Kop* d.o.o. Tešanj potpisani su ugovori za sanaciju puteva *Hrvatinići-Tugovići* u MZ Tešanj, *Gušća* u MZ Tešanj, *Kotlanice-Bučje* u MZ Raduša, *Karadaglje-Oručje* u MZ Karadaglje, *Ripna* u MZ Jablanica, *Roše* u MZ Jablanica, *Zelenika* u MZ Jablanica, *Zupčanik* u MZ Šije, *Joldići* u MZ Tešanj, *Tešanjka-Lepenica* u MZ Tešanjka, *Toplana-Čifluk (Madi)* u MZ Bukva, *Mujezinovići* u MZ Dobropolje- Mekiš, *Novo Selo-Šeljme* u MZ Novo Selo, *Salkanovići* u MZ Medakovo i *Vehabi* u MZ Dobropolje-Mekiš.

Sa firmom *AB trans* d.o.o. Tešanj potpisani su ugovori za sanaciju i asfaltiranje puta *Hatkići* u MZ Oraš Planje i dogradnja mosta u Čifluku.

Vrijednost ova tri ugovora je 92.541,75KM.

Završena je sanacije puteva na 15 lokacija na području općine Tešanj, a radovi na preostala dva projekta su u toku.



U TEŠNJU OTVORENA NOVA GRADSKA BIBLIOTEKA

Načelnik općine Tešanj Suad Huskić i direktor Turske agencije za saradnju i razvoj TIKa Huseyin Šanli, svečano su otvorili zgradu Opće biblioteke. Projekat su zajednički finansirale Općina Tešanj i Turska državna agencija za međunarodnu saradnju i razvoj (TIKA).



Općina Tešanj je kroz historiju poznata po svom bibliotekarstvu, međutim sve do sada tešanjaska Biblioteka nije imala svoje vlastite prostorije. Ukupna vrijednost projekta, od ideje do izgradnje zgrade, iznosila je 1.119.750 KM, a sva sredstva su osigurala Općina Tešanj i Turska državna agencija za međunarodnu saradnju i razvoj. TIKA je finansirala radove na projektu u vrijednosti od 516.750 KM, dok je Općina Tešanj izdvojila ostatak sredstava u vrijednosti 603.000 KM.



Koliko mi je poznato, ova naša Biblioteka je jedina gradska biblioteka koja je sagrađena u posljednje vrijeme u BiH. Općina Tešanj je kroz historiju poznata po svom bibliotekarstvu, međutim sve do sada Tešanjaska biblioteka nije imala svoje vlastite prostorije. Ideja za izgradnju zgrade Biblioteke javila se 2007. godine na prijedlog direktora Biblioteke Esmira Bašića. Od tada, općinske administracije u dva mandata su uložile napor i, evo danas imamo savremenu biblioteku na ponos svih građana Tešnja. Ovom prilikom želim se zahvaliti svima koji su učestvovali u izgradnji Biblioteke, posebno donatorima iz Turske, kazao je tom prilikom Načelnik općine Tešanj Suad Huskić.

Tešanjaska Biblioteka je sa svojim bogatim knjižnim fondom značajan i nezaobilazan izvor za istraživanje svih nauka. Biblioteka se posebno ponosi zbirkom izrazito raritetnih djela čiji fond broji ukupno 2000 rijetkih knjiga. Najstarija štampana knjiga je iz 1605. godine, a među najdragocjenijim su i najstariji rukopis na arapskom jeziku koji potiče još iz 1417. godine, te najstariji rukopis na turskom jeziku iz 1560. godine. Posebno je zanimljivo što Biblioteka sadrži knjige koje su nastale prepisivanjem u Tešnju, između ostalog i u tešanjskim medresama. Zgrada savremene Biblioteke bit će dostupna svim istraživačima, studentima, učenicima, profesorima i ostalim ljubiteljima knjige.

OBILJEŽEN 9. SEPTEMBAR DAN OSLOBOĐENJA OPĆINE TEŠANJ OD FAŠIZMA

Povodom općinskog praznika 9. septembra - Dana oslobođenja općine Tešanj od fašizma položeno je cvijeće na Centralnom spomen obilježju šehidima i poginulim borcima 1992-1995. godina, na bistu narodnog heroja Huse Hodžića i Partizanskom groblju u Tešnju, kao i na spomen obilježja u Jelahu i Tešanjci. Cvijeće su položili predstavnici Općine Tešanj i boračkih udruženja, te mladi izviđači Odreda Crni vrh. Nakon polaganja cvijeća, u 18,00 sati u Maloj sali Centra za kulturu i obrazovanje održana je tribina *Bošnjaci i Drugi svjetski rat*.



TEŠANJSKI BIZNISMEN HAJRUDIN AHMETLIĆ DONIRAO SREDSTVA ZA IZGRADNJU OBJEKTA NAMIJENJENOG DJECI SA POSEBNIM POTREBAMA

Načelnik općine Tešanj, Suad Huskić je sa vlasnikom kompanije HIFA Petrol Hajrudinom Ahmetlićem posjetio gradilište novog objekta namijenjenog za dnevni boravak djece sa posebnim potrebama u Tešnju. Riječ je o donaciji Hajrudina Ahmetlića u iznosu od oko 250.000 KM iz kojih se u potpunosti realizira ovaj, za općinu Tešanj, društveno odgovoran projekat.

Hajrudin Ahmetlić kao jedan od uspješnih tešanjskih biznismena i dobrih ljudi odlučio se da finansira projekat od značaja za općinu Tešanj. Kao prioritet za zajednicu odabrali smo da se gradi objekat za dnevni boravak djece sa posebnim potrebama. Već pet godina putem Centra za socijalni radi Općine Tešanj i Udruženja roditelja radimo sa ovom djecom tako što smo ih organizovano dovozili iz svih sredina kako bi stručnjaci uz zdravstveni nadzor mogli raditi na njihovoj edukaciji i razvoju. Izgradnjom novog dnevnog boravka, uvjeti za rad sa djecom sa posebnim potrebama će biti na najvišem potrebnom nivou. Ovom prilikom u ime svih građana Tešnja, u ime djece i roditelja, zahvalio bih se gospodinu Ahmetliću na izuzetno velikodušnoj donaciji. Tešanj je od ranije poznat kao mjesto gdje biznis ima dušu. i gdje su ljudi oduvijek pomagali zajednicu, kazao je tom prilikom Načelnik općine Tešanj Suad Huskić.

Sam objekat ostaje u općinskom vlasništvu. Općina je osigurala lokaciju i sve potrebne dozvole za gradnju, a donator je preuzeo odabir i plaćanje izvođača, kao i angažman nadzora izvođenja radova. Objekt se gradi uz postojeću zgradu obdaništa, a koristit će ga odmah po završetku oko 30 djece sa posebnim potrebama različitog uzrasta iz svih naselja općine Tešanj.

Gradnja objekta je u završnoj fazi – preostalo je postavljanje poda, čišćenje, uređenje ograde i igrališta i asfaltiranje prilaza. Objekt se nalazi uz postojeću zgradu Obdaništa, a koristit će ga oko 30 djece sa posebnim potrebama različitog uzrasta iz svih naselja općine Tešanj.



PODRŠKA RAZVOJU PUTEM NOVČANIH POTICAJA

U organizaciji Instituta za razvoj mladih KULT, u Sarajevu je održan okrugli sto na temu „Budžetski poticaji u BiH“, kome su prisustvovali predstavnici državnih institucija i nevladinih organizacija. Predstavljeni su rezultati istraživanja o dodijeli poticaja a koji pokazuju pad izdvajanja na nivou države i neusaglašenost načina izdvajanja i strateških opredjeljenja.

Učesnik okruglog stola Hamzaliya Hojkurić rekao je da Općina Tešanj već 10 godina zaredom izdvaja 300.000 KM godišnje za razvoj poljoprivrede i 5 godina zaredom 50.000 KM godišnje za osnivanje firmi mladih poduzetnika. Pored različitih poticaja viših nivoa vlasti, to je rijedak i autentičan općinski poticaj u BiH koji je kao model već prepoznat i preuzet od drugih. Za dodjelu poticaja potreban je prije svega strateški pristup a budžetska izdvajanja trebaju dati rezultate, kao

što su samozapošljavanje, otvaranjem novih radnih mjesta, otvaranje novih firmi, povećanje obima proizvodnje. Dodjela poticaja mora biti transparentna, sa promocijom prema korisnicima, sa praćenjem namjenskog korištenja i sa izvještavanjem. "Ono što je kod drugih postalo uobičajeno, naša izdvajanja za poticaje se ne smanjuju a planirane isplate se na vrijeme realizuju", istakao je pomoćnik Općinskog načelnika Hamzaliya Hojkurić.



9. SAJAM PČELARSTVA

U Tešnju je 11. septembra otvoren 9. Sajam pčelarstva Tešanj 2015. koji je trajao dva dana. Organizator Sajma je Udruženje građana Pčela iz Tešnja. Prigodnim govorom prisutnim su se obratili predsjednik Udruženja Pčela Mahmo Husibegović, predstavnik Upravnog odbora Kantonalnog saveza pčelara Senad Ahmić i Općinski načelnik Suad Huskić, koji je ujedno i otvorio Sajam, te kazao da je ovaj Sajam potvrda da je Tešanj ekološki zdrava sredina.



POKLONI ZA 559 NOVIH UČENIKA

Povodom početka nove školske godine, Općinski načelnik Suad Huskić i predsjedavajući Općinskog vijeća Senad Subašić posjetili su osnovne škole sa područja općine Tešanj i ovom prilikom učenicima koji kreću u prvi razred osnovne škole uručili prigodne poklone, koji u sebi sadrže 11 artikala potrebnih svakom učeniku.

Očekujemo da će učenici marljivo učiti i postizati dobre rezultate u različitim područjima, a mi odrasli i lokalna zajednica ćemo biti spremni da ih podržimo. Tešanj ima viziju razvoja i kao takav je prepoznatljiv, a tu viziju treba da nastave ostvarivati nove generacije odgojenih, obrazovanih i uspješnih mladih ljudi, kazao je Općinski načelnik.

U školskoj 2015/2016. godini u devet osnovnih škola sa područja općine Tešanj upisano je 559 novih učenika, i svi oni su dobili poklon paket.



POSJETA POVODOM KURBAN BAJRAMA

U povodu Kurban bajrama, Predsjedavajući Općinskog vijeća Senad Subašić, pomoćnik Općinskog načelnika Sabahudin Omerbašić i Enver ef. Kurtić, u ime *Medžlisa Islamske zajednice Tešanj* posjetili su djecu na Pedijatrijskom odjelu Opće bolnice Tešanj i djecu u Udruženju roditelja, djece i omladine sa posebnim potrebama Tešanj. Ovom prilikom, djeci su uručeni prigodni paketići.

Već nekoliko godina tradicionalno predstavnici Općine i Medžlisa IZ Tešanj posjećuju bolesnike u Općoj bolnici Tešanj.

Također, delegacija Općine Tešanj je, u društvu predstavnika Organizacije porodica šehida i poginulih boraca i predsjednika RVI, posjetila šest porodica (tri šehidske porodice i tri porodice RVI), te im ovom prilikom uručila skromne hedije.



KBS BORAC JELAH: ZLATNA MEDALJA

Predsjedavajući Općinskog vijeća Senad Subašić i pomoćnik Općinskog načelnika Azra Muslija primili su predstavnike Kluba borilačkih sportova Borac iz Jelaha – višestrukog prvaka države u kimboksu Hasana Huseinbašića i trenera Huseina Alibalića.

Na nedavno održanom Evropskom juniorskom prvenstvu u kimboksu u Španiji, reprezentativac BiH Hasan Huseinbašić osvojio je zlatnu medalju.

Ovom prilikom, Predsjedavajući Općinskog vijeća Senad Subašić i pomoćnik Općinskog načelnika Azra Muslija čestitali su Hasanu na postignutom uspjehu i poklonili skromnu novčanu nagradu.



NAČELNIK OPĆINE TEŠANJ SUAD HUSKIĆ POTPISAO UGOVORE U OKVIRU PROJEKTA „POSLOVNE IDEJE MLADIH“ SA 7 BUDUĆIH PODUZETNIKA

Načelnik općine Tešanj Suad Huskić je u okviru projekta «Poslovne ideje mladih» potpisao ugovore o podsticajima u svrhu pokretanja vlastitih biznisa sa 7 budućih poduzetnika. Potpisivanju ugovora prisustvovali su, između ostalih predsjedavajući Općinskog vijeća Tešanj Senad Subašić, članovi Komisije koja je ocjenjivala kvalitet poslovnih ideja, privrednici, te raniji korisnici sredstava iz ovog projekta.

Projekat "Poslovne ideje mladih" pokrenut je 2011. godine. U njegovu provedbu Općina je do sada investirala cca. 225 hiljada KM čime je pokrenuto 31 preduzeće, i otvoreno do sada 54 nova radna mjesta. Po ovom modelu Općina finansira troškove registracije preduzeća, doprinose za dio zaposlenih u periodu do 3 godine, a u određenim slučajevima Općina je finansirala troškove zakupa poslovnog prostora.

Veoma smo ponosni na ovaj projekat i u pet godina njegove provedbe mladi u Tešnju su pokazali svoju poslovnu kreativnost i potvrdili da imaju razvijen poduzetnički duh. Mladi su budućnost i sredina u kojoj mladi imaju šansu ostvariti „vlastite snove“ na svoju i korist cijele zajednice, poželjna je i partner je za budućnost svakoj ozbiljnoj investiciji. Osim toga, naš primjer je primijećen i mnogo šire, kako od domaćih instanci koje brinu o mladima, tako i od relevantnih međunarodnih asocijacija, riječi su Suada Huskića, Načelnika općine Tešanj.

Model koji je razvila Općina Tešanj prepoznat je od Instituta za razvoj mladih KULT i oni su taj model prenijeli u 6 drugih općina u BiH. Pored toga, pripremili su Vodič za primjenu ovog modela podrške start-up biznisa, koji sadrži obrasce, uputstva, dokumente, koji su potrebni za realizaciju. Time je, ustvari, iskustvo i dobra praksa Tešnja prenesena na sve druge općine u BiH koje su zainteresirane da takva iskustva koriste.

Osim toga, Mreža asocijacija lokalnih vlasti jugoistočne Evrope (NALAS) u novoj publikaciji "Najbolje inicijative za rodnu ravnopravnost i mlade", objavila je dobru praksu Općine Tešanj sa temom "Poslovne ideje mladih". Dobra praksa Općine Tešanj je prepoznata kao jedna od boljih u Jugoistočnoj Evropi. Ova publikacija će uskoro biti distribuirana svim općinama i gradovima Jugoistočne Evrope. Publikacija je na engleskom jeziku i može se pogledati na:

http://www.nalas.eu/News/GeniYouth_Publication

Ove godine u okviru projekta „Poslovne ideje mladih“ prijavljeno je ukupno 13 poslovnih ideja i nakon ocjene koju je provela Komisija sastavljena od privrednika, odabrano je 7 najuspješnijih koji će dobiti podršku za pokretanje vlastitog biznisa.



USPJEŠNA PROIZVODNJA KORNIŠONA NA PODRUČJU TEŠNJA

U organizaciji firme Agrona i Udruženja poljoprivrednika iz Šija, 3. oktobra održana je u Šijama prigodna svečanost povodom uspješne berbe kornišona ove godine, na kojoj su prisustvovali poljoprivredni proizvođači šire regije Doboja.

U prošloj godini na općini Tešanj bilo je 23 proizvođača sa 116 tona otkupljenih kornišona a u ovoj godini radilo je kornišon 70 proizvođača i prodali su 380 tona. Za podršku tako uspješnoj proizvodnji sa osiguranim plasmanom i redovnom isplatom otkuplivača, Općina je za poticaj prošle godine isplatila 20.000 KM dok u ovoj godini će biti isplaćeno oko 50.000 KM, rekao je u prigodnom obraćanju pomoćnik Općinskog načelnika Hamzalija Hojkurić.

Istoga dana u organizaciji ZZ Gračanka organizovana je u Stjepan Polju izložba krupne stoke i poljoprivrednih proizvoda koji se proizvode u saradnji sa zadrugom. Putem ove zadruge značajno je učešće i proizvođača kornišona iz Tešnja, te je od ukupno dvanaest nagrađenih, šest nagrada pripalo našim proizvođačima.



OBAVJEŠTENJE O OBJAVLJIVANJU JAVNIH POZIVA ZA POTICAJE KANTONALNOG MINISTARSTVA ZA PRIVREDU

Ministarstvo za privredu Zeničko-dobojskog kantona objavilo je javne pozive za poticaje za 2015. godinu.

Javni pozivi su objavljeni za prikupljanje zahtjeva za odobravanje i dodjelu finansijskih sredstava namjenjenih subvencioniranju:

- administrativnih troškova kod pokretanja poslovnih ideja i registracije privrednih subjekata,
- administrativnih troškova kod izgradnje proizvodnih objekata,
- energetske efikasnosti javnih objekata,
- troškova jačanja konkurentnosti,
- investicija kod obrta iz područja prerađivačke djelatnosti i obavljanja djelatnosti prema Uredbi o zaštiti tradicionalnih i starih zanata,
- troškova organizacije poslovnih zona na području ZDK,
- inovatora,
- uvođenje i certifikacija međunarodnih standarda,
- povećanja iskorištenosti kapaciteta u ugostiteljskim objektima skupine "Hoteli" i podsticanja turizma u seoskim domaćinstvima.

Javni pozivi ostaju otvoreni 60 dana, odnosno u razmatranje će se uzeti samo zahtjevi koji budu zaprimljeni na Protokol Kantona najkasnije do 09.11.2015. godine.

Više informacija o načinu prijave i uslovima možete pogledati na službenoj internet stranici ministarstva: www.zdk.ba ili na telefone 032/460-720 i 032/460-721 ili na E-mail: min.privreda@zdk.ba

Predstavnici Federalne uprave civilne zaštite- Sektor za deminiranje, u prisustvu predstavnika BH MAC-a, Službi civilne zaštite Općine Tešanj predali su deminirani projekat u MZ Kalošević, "Vrela" ID 2604, površine 80.184 m2. Projekat je deminiran od strane deminerskih timova Federalne uprave civilne zaštite metodom tehničkog izviđanja. Ovo predstavlja nastavak aktivnosti na deminiranju preostalih sumnjivih površina na području MZ Kalošević.



ZAMJENA KARATA MINSKE SITUACIJE

Predstavnici Službe civilne zaštite izvršili su zamjenu karata minske situacije na dvije lokacije (Piljuži-Križ i Oraš Planje). Tokom redovnih kontrola bilborda na kojima su postavljene karte minske situacije, utvrđeno je da su nesavjesni građani tri bilborda sa kartama značajno oštetili. Karte je obezbjedilo NVO Posavina bez mina, koja je i ranije realizovala cjelokupan projekat.

Ovom prilikom Služba civilne zaštite poziva sve građane da ne uništavaju postavljene bilborde i karte sa minskom situacijom, te da po istim ne lijepe druge plakate.



NOVA RECIKLAŽNA OSTRVA

Nakon održanog sastanka sa predstavnicima firme *Eko život* d.o.o. Tuzla (uz posredovanje AS Group) isporučeno je pet setova (po tri kontejnera) za ambalažni otpad koji su postavljeni na području općine Tešanj.

Na području općine Tešanj postojalo je 20 reciklažnih ostrva, a ovom donacijom taj broj je povećan na 25 ostrva za razdvojeno prikupljanje otpada. Cilj nam je ostrva postaviti na cijelom područje općine Tešanj, što je u skladu sa našom Eko strategijom – Tešanj, sredina ekološke svijesti, čistoće i reda, kazao je pomoćnik Općinskog načelnika Hamzaliya Hojkurić.

Pripremu lokacija izvršila je Općina, a KP RAD je preuzeo pražnjenje, kao i sa sadašnjih 20 lokacija. Pored budućih 25 zelenih ostrva, naše Komunalno preduzeće redovno preuzima prikupljenu PET ambalažu od 15 škola sa područja općine.





OPĆINA TEŠANJ
www.opcina-tesanj.ba

Projekat prikupljanja i odvodnje otpadnih voda

Poštovani sugrađani,

U proteklom periodu radili smo na ispunjavanju uslova za izgradnju jedinstvene kanalizacione mreže na cijeloj teritoriji općine Tešanj. Najveći dio projektovanja je završen i već je ugovorena prva faza realizacije.

Od 13. augusta su počeli radovi na gradnji glavnog kanalizacionog kolektora (od sjedišta Komunalnog preduzeća Rad, u Tešanju do benzinske pumpe Kosovčić, u Novom Selu). U ovoj fazi će biti urađena i rekonstrukcija kanalizacione mreže u Titovoj ulici u Tešnju. Vrijednost ova dva projekta je oko 2,5 miliona maraka, a rok za završetak radova je 90 dana.

Tokom radova na ovim dionicama puteva, saobraćaj će biti regulisan na drugačiji način o čemu će stanovništvo biti blagovremeno obaviješteno. Ovom prilikom, molimo sve građane, a posebno učesnike u saobraćaju za razumijevanje i strpljenje.

Trenutno vršimo pripremne aktivnosti kako bismo ugovorili radove za narednu dionicu od Jelaha do Žabljaka i od Tešanjke do Kraševa.

Izgradnja novog kanalizacionog sistema sa uređajem za prečišćavanje najveći je općinski projekat posljednjih godina, za koji su sredstva obezbijedena iz IPA fondova (donatorska sredstva Europske unije), povoljnim kreditnim aranžmanom kod Europske investicijske banke (EIB), te budžetom općine Tešanj. Projekat je razvijen u saradnji sa Federalnim ministarstvom poljoprivrede, vodoprivrede i šumarstva i Federalnim ministarstvom finansija.



TEŠANJ SREDINA EKOLOŠKE SVIJESTI, ČISTOĆE I REDA